

共同經課 - 1

使徒行傳二章一節~二十一節

1 五旬節的期已經到，in攏聚集佇一所在。2 忽然，對天有聲，親像大風啲吹，充滿in所坐歸間的厝，3 就有啲分開的舌出現互in看見，親像火的舌，歇佇逐人的頂面。4 in攏受聖神充滿，才開嘴講別樣的腔口，是照聖神所賞賜in講的。5 彼時，有虔誠的猶太人對天下逐國來的，住佇耶路撒冷。6 此個聲一下起，眾人聚集紛紛亂亂，因為逐人聽見in照伊家己的土腔來講，就攏印愕；7 奇怪講：「你看，諸個啲講的豈無一概是加利利人嗎？8 怎樣咱聽in講照咱逐人所出世的土腔啊？9 咱諸個帕提亞人、米太人、以攔人，及惦佇米所波大米、猶太，及加帕多家、本都、及亞西亞、10 弗呂家，及旁非利亞、埃及，近倚古利奈的呂彼亞，諸個地方的人，以及對羅馬來的出外人，有的是猶太人，有的是入猶太教的人，11 革哩底人、亞拉伯人，攏聽in用咱的腔口，來講上帝的大事。」12 就攏印愕躊躇，相及講：「這甚麼意思？」13 亦有別人恥笑in講：「in是飲新酒啲醉。」14 總是彼得及十一個使徒倚啲，大聲給in講：「猶太人及攏總倚起佇耶路撒冷的百姓啊，恁著知此個，亦著致意聽我的話。15 諸個人毋是酒醉；親像恁所拍算，因為此霎抵才頂晡九點鐘。16 這就是託先知約珥所講的，講：17 上帝講：佇路尾的時日，我欲用我的神降落佇凡有肉體的。恁的後生恁的查某子欲做先知講話；恁的少年人欲看見異象；恁的老人欲得著眠夢。18 佇許個日，我也欲用我的神降落佇我的奴僕奴婢，in亦欲做先知來講。19 頂面佇天裡，我欲顯出奇事；下面佇地裡，我欲顯出神蹟；就是血，及火，及煙霧。20 日欲變做暗，月欲變做血；佇主大閣榮顯的日未到的代先。21 閣凡若求叫主的名的，會得著救。」

共同經課 - 2

詩篇一百零四篇二十四節~三十四節，三十五 b 節

24 耶和華啊，你所造的怎樣許多！攏是你用智慧造成的；遍地滿滿你的富有。25 遐有海，大闊闊；其中有算袂了的動物，大細的活物攏有。26 佇遐有船啲行，有所創造的大魚游來游去。27 諸個攏啲聽候你通照時互in食物。28 你互in，in就拾起來；你展開你的手，in得著好物夠飽。29 你掩你的面，in就掛慮；你將in的氣收回，in就死無，來歸佇土粉。30 你發出你的神，in就受創造；你互地面換做新。31 願耶和華的榮光永遠佇啲！願耶和華為著伊所造的來歡喜！32 伊看地，地就振動；伊摸山，山就出煙；33 我欲一世人向耶和華吟詩！我猶活的時，欲向我的上帝唱歌謳嘍！34 願伊掠我的靜靜想做合意！我欲因為耶和華歡喜！35 我的心神啊，著謳嘍耶和華！恁著謳嘍耶和華！

共同經課 - 3

哥林多前書十二章三 b 節~十三節

3 所以我互恁知，互上帝的神感動來講的，無人講「耶穌是通咒詛」；若毋是互聖神感動的，也無人會講「耶穌是主」。4 今恩賜有分別，若是神是像一個。5 職份有分別，若是主是像一個。6 功用有分別，若是上帝像一個，施行萬事佇眾人中的。7 若是聖神的顯明是賞賜逐人，欲利益眾人。8 因為有的對神用智慧的話互伊，有的照此個神用知識的話互伊，9 閣有人佇此個神用信互伊，有的佇此個神用醫病的恩賜互伊，10 有的互伊會行各樣的權能，有的互伊做先知，有的互伊會分別諸個神，閣有的互伊會講逐樣的音語，有的互伊會翻譯逐樣的音語。11 諸個攏是像一個神所施行的、照伊所愛的隨樣分互逐人。12 因為親像身軀是一個，也有多多體；閣身軀的體雖然多，攏是一個身軀；基督也是按呢。13 因為咱眾人無論是猶太，抑是希利尼，做奴才的，抑是自由的，攏曾受洗禮佇一個神，來屬佇一個身軀，也攏總曾飲一個神。

共同經課 - 4

約翰福音七章三十七節~三十九節

37 當節期的尾日，就是上大的日，耶穌倚啲叫講：「若有嘴乾的人，著就近我來飲。38 信我的人親像聖經所講：『有活水的溪，欲對伊的腹內流出。』」39 伊講按呢是指信伊的人所欲受的聖神。彼時未有賞賜聖神，因為耶穌未有得著榮光。